


ՄԵՐ ՀՈՐԵԼՅԱՐՆԵՐԸ

ՀԱՍՄԻԿ ՍԵԴՐԱԿԻ ԱՎԵՏՅԱՆ

Լրացավ Հասմիկ Սեդրակի Ավետյանի ծննդյան 70 և գիտական գործունեության 45 տարին:

Կան մարդիկ, որոնք երկարամյա անբասիր աշխատանքով կուտակելով գիտելիքներ և փորձ, իրենց 70 ամյակը դիմավորում են ավելի իմաստավորված՝ պատրաստ վերստին ծառայելու ժողովրդին ու գիտությանը: Այդպիսիներից է Հասմիկ Ավետյանը:



Հ. Ավետյանը ծնվել է ուսուցչի ընտանիքում: միջնադարգ կրթությունը ստացել է Թիֆլիսի իգական գիմնազիայում, իսկ 1920 թվին ընդունվել Պոլիտեխնիկ ինստիտուտի գյուղատնտեսական ֆակուլտետը:

1926 թվին, ավարտելով ինստիտուտը, տեղափոխվում է Երևան և աշխատանքի անցնում Հայկ. ՍՍՀ հողժողկոմատի բույսերի պաշտպանության բաժնում, որպես միջատաբան:

Բույսերի պաշտպանության նոր կազմակերպված գիտահետազոտական կայանում լայն աշխատանքներ է ծավալում՝ պարզելու Հայաստանի գյուղատնտեսական կուլտուրաներին և անտառներին վնասող միջատների տեսակային կազմը, տարածվածությունը, կենսակերպը: 1929 թ. Հ. Ավետյանը Հողժողկոմատի կողմից գործուղվում է Հենինգրադ՝ Կենդանաբանության և ֆիտոպա-

թուղթիայի ինստիտուտ (ԻԶԻՖ)՝ մասնագիտության մեջ խորանալու: Ինստիտուտը հաջող ավարտելուց հետո նա աշխատանքը շարունակում է Հայաստանի բույսերի պաշտպանության կայանում: Շուտով կայանը դառնում է ինստիտուտ, առաջանում են նոր հարցեր, պրոբլեմներ: 1931 թ. Մ. Մակարյանի և Հ. Ավետյանի հեղինակությամբ լույս է տեսնում Հայաստանի վնասակար էնտոմոֆագունային նվիրված առաջին օրիգինալ աշխատությունը՝ «Հայկ. ՍՍՀ գյուղատնտեսական և անտառային բույսերի վնասատուները», որն այսօր էլ չի կորցրել իր թարմությունը և հաճախակի օգտագործվում է միջատաբանների կողմից:

1935 թ. կազմակերպվում է ՍՍՀՄ գիտությունների ակադեմիայի Հայկական ֆիլիալը: Հ. Ավետյանը հրավիրվում է Կենսաբանության ինստիտուտ որպես ավագ գիտաշխատող: 1938 թ. նույն ինստիտուտում դառնում է կենդանաբանության սեկտորի վարիչ: 1942 թ. նա կատարում է նաև կենսաբանական ինստիտուտի գիտական քարտուղարի պարտականությունները:

1943 թ. նոյեմբերին հիմնվում է Հայկ. ՍՍՀ ԳԱ, որի կազմի մեջ է մտնում նաև նորակազմ Կենդանաբանության ինստիտուտը: Շարունակելով աշխատել այդ ինստիտուտում որպես ավագ գիտական աշխատող, Հ. Ավետյանը միաժամանակ աշխատում է (1944—1948 թթ.) կենսաբանական գիտությունների բաժանմունքում, որպես գիտական քարտուղար:

1948—1952 թթ. Հ. Ավետյանը վարում է միջատաբանության սեկտորի վարիչի պաշտոնը՝ ԳԱ ֆիտոպաթոլոգիայի և կենդանաբանական ինստիտուտում:

1953—1957 թթ. զբաղեցնում է Կենդանաբանության ինստիտուտի դիրեկտորի պաշտոնը, միաժամանակ մնալով որպես անողնաշարավորների սեկտորի վարիչ: 1957 թվից մինչև այժմ նույն ինստիտուտում ավագ գիտական աշխատող է:

Շատ լայն է Հասմիկ Ավետյանի գիտական հետաքրքրությունների շրջանակը: Նա կենտրոնանում է պտղատու ծառատեսակների վնասատուների ուսումնասիրության վրա: Աշխատելով գիտական հիմնարկներում, Հ. Ավետյանը հաճախակի եղել է Հայաստանի կոլեկտիվ և սովետական տնտեսություններում, մասնագիտական արժեքավոր խորհուրդներով օգնելով վնասատուների դեմ տարվող պայքարի գործին:

30-ական թվականներին Զ. Գ. Սուլջյանի հետ միասին հրատարակում է «Պտղատու ծառատեսակների վնասատուները և հիվանդությունները ու պայքարը նրանց դեմ» գրքերը (1934 և 1937 թթ.): 1933 թվին նրա նախաձեռնությամբ և անմիջական ղեկավարությամբ կազմակերպվում է կենսաբանական մեթոդով պայքար՝ խնձորենու լուրջ վնասատու՝ Բրդապատ լվիճի դեմ:

Աֆելինուսի օգտագործումը վնասատուների դեմ կենսաբանական եղանակով կազմակերպված առաջին հաջողակ փորձն էր Հայաստանում և առաջիններից մեկը ՍՍՀՄ-ում: Հետագայում Հասմիկ Ավետյանի գիտական հետաքրքրությունների ոլորտը ավելի է լայնանում: Նա զբաղվում է պտղակերի, կոկցիդների, ոսկեբզեզների և մի շարք այլ առաջնակարգ վնասատուների բազմակողմանի ուսումնասիրությամբ: Նրա կողմից հավաքվում է հարուստ նյութ՝ որը շարադրվում է «Պտղատու ծառատեսակների վնասատուները Հայկ. ՍՍՀ-ում» մենագրության մեջ (1952 թ.): Նույն աշխատությունը 1953 թ. նրա կող-

մից որպես դիտարկում աշխատանք ներկայացվում է պաշտպանության կենսաբանական գիտությունների թեկնածուի աստիճան ստանալու համար:

Հայաստանի գյուղատնտեսական կուլտուրաների վնասատուների մասին աշխատություններում այն մինչև օրս մնում է եզակի, պարունակում է հարուստ տեղեկություններ՝ պտղատու ծառատեսակների վնասատուների տեսակային կազմի, տարածվածության, ֆենալոգիայի, պատճառած վնասի (տարբեր գոտիներում) և այլնի մասին: Այդ աշխատությունը այսօր էլ մնում է հայ միջատաբանների սեղանի գիրք և լայնորեն օգտագործվում: 1947 թ. Հայաստանում բամբակենու դաշտերում հանդես է գալիս նոր վտանգավոր վնասատու՝ տուղտացեցը: Նրա կողմից առաջին անգամ ուսումնասիրվում են տուղտացեցը պարագիտող միջատները, փորձեր են արվում նրա դեմ տրիխոգրամա օգտագործելու: Պարզվում է, որ տուղտացեցի վրա պարագիտում են 20-ից ավելի միջատներ:

Այդ տարիներից սկսած Հ. Ավետյանը նվիրվում է պտղատու ծառատեսակների վնասատուների էնտոմոֆագերի ուսումնասիրմանը: Նրա կողմից կազմած քարտարանը բովանդակում է 900 տեսակի էնտոմոֆագ:

Վ. Ա. Տրյապիցինի և Ե. Կ. էրտեցյանի հետ համատեղ հրատարակության է պատրաստել Chalcidoidea վերնաընտանիքին նվիրված աշխատությունը, որի մեջ տրվում է 324 տեսակ:

Հասմիկ Ավետյանը հրատարակել է աշխատություններ նաև վնասատու միջատների այլ խմբերի վերաբերյալ (Շալա ծղրիղը, կեղծ կեղևակերը և այլն) որոնք մեծապես նպաստել են այդ վնասատուների դեմ պայքարի միջոցների մշակմանը: Նրա հետազոտությունների արդյունքներից շատերը արտացոլվել են Գյուղատնտեսության մինիստրության կողմից կազմվող հրահանգներում:

Առանձին հետաքրքրություն են ներկայացնում Հասմիկ Ավետյանի հետազոտությունները արարատյան կոշենիլի միջատի (որդան կարմիր) վերաբերյալ: Հայկ. ՍՍՀ Մինիստրների Սովետի հանձնարարությամբ ներկայումս Կենդանաբանության ինստիտուտին կից կազմակերպված է հատուկ լաբորատորիա, որը ղեկավարվում է կոշենիլի ուսումնասիրությամբ՝ նպատակ ունենալով վերականգնելու բնական կարմիրի արտադրությունը Հայաստանում: Ի դեպ, ասենք, որ մի ժամանակ Հայաստանի որդան կարմիրը համաշխարհային հռչակ ուներ: Այդ հետազոտությունների ժամանակ օգտագործվում են նաև Ավետյանի կողմից ժամանակին կատարած հետազոտությունների արդյունքները:

Հսկայական է այն ավանդը, որը Հ. Ավետյանը ներդրել է «Գյուղատնտեսական կուլտուրաների, անտառի և պահեստի վնասատուները Հայաստանում» աշխատությունը կազմելու և հրատարակության նախապատրաստելու լոգործում: Հանդիսանալով աշխատության հեղինակներից և խմբագիրներից մեկը, նա ջանք չի խնայել բարձրորակ ձեռնարկ ստեղծելու համար, որը բովանդակում է տեղեկություններ Հայաստանում տարածված 1700-ից ավելի տեսակ վնասատուների (միջատներ, տզեր, նեմատոդներ, կրծողներ և այլն) վերաբերյալ: Աշխատությունը, որը լույս կտեսնի հայերեն 50 մամուլ ծավալով, անշուշտ մեծ ծառայություն կմատուցի բույսերի պաշտպանության գործին Հայաստանում:

Դժվար է գերազնահատել այն ստեղծագործ, անձնուրաց աշխատանքը, որը տասնյակ տարիներ Հ. Ավետյանի կողմից տարվել է՝ Կենդանաբանության ինստիտուտում՝ միջատների հավաքածուներ ստեղծելու և պահպանելու ուղ-

ղությամբ: Այսօր առաջին հերթին դարձյալ նրան ենք պարտական, որ Հայաստանում ունենք միջատների հարուստ հավաքածու, որը Սովետական Միությունում իր տեսակի մեջ համարվում է լավագույններից մեկը:

Հետազոտական աշխատանքներին զուգընթաց Հ. Ավետյանը ուժ և եռանդ չի խնայել երիտասարդ կենսաբաններ պատրաստելու գործում: Նրանցից շատերը արդեն ճանաչված գիտնականներ են:

Նրա դիրեկտորության օրոք ինստիտուտը նախաձեռնեց «Հայաստանի կենդանական աշխարհ» բազմահատոր աշխատության հրատարակությունը: Նա ակտիվ մասնակցություն է ունեցել նաև ամբողջ Ակադեմիայի հրատարակչական գործում: Ներկայումս Հ. Ս. Ավետյանը հանդիսանում է «Հայաստանի կենսաբանական հանդեսի» խմբագրական կոլեգիայի անդամ:

1963 թվից, այսինքն հիմնադրման օրից, Հասմիկ Ավետյանը Համամիութենական միջատաբանական ընկերության Հայկական բաժանմունքի նախագահն է: Աշխատանքային երկարամյա անբասիր գործունեության համար Հասմիկ Ավետյանը պարգևատրվել է Լենինի շքանշանով, Հայկ. ՍՍՀ Գերագույն Սովետի պատվոգրով, ինչպես նաև աշխատանքային արիության համար և Լենինի 100 ամյակի հոբելյանական մեդալներով:

Հ. Ավետյանը երկու անգամ ընտրվել է Երևանի Կիրովյան շրջսովետի դեպուտատ: 1957 թվից մինչև 1963 թիվը եղել է ՀՍՍՀ Գերագույն դատարանի ժողովրդականատենական:

Ի սրտե ցանկանանք սիրելի Հասմիկ Սեդրակի Ավետյանին երկար տարիների կյանք, քաջառողջություն, կենսուրախություն և ստեղծագործական նոր հաջողություններ: